




Flö. bu.

24







THEATRUM  
VIRTUTIS ET HONORIS,  
AUGUSTIS MAGNORUM  
CÆSARUM FILIIS

A B

AUGUSTISSIMIS PARENTIBUS  
AD IMPERIUM DESTINATIS  
EXSTRUCTUM,

E T

ILLUSTRISSIMIS, PERILLUSTRIBUS, RE-  
VERENDIS, RELIGIOSIS, PRÆNOBILIBUS, NOBI-  
LIBUS, AC DOCTISSIMIS DD. AA. LL. ET PHI-  
LOSOPHIÆ

DOCTORIBUS,

P E R

R. P. WOLFGANGUM PLÖKNER  
è Societate Jesu, AA. LL. & Philosophiæ Docto-  
rem, ejusdémque Professoremeritum, ac p. t. Se-  
niorem, Consistorialem,

In Aula Academica solenni ritu creatis

A B

Illustrissima Rhetorica Viennensi dedicatum,  
Mense Julio, Anno M. DC. XCVII.

Viennæ Austriæ, Typis Matthiæ Sischowitz, Universitatis Typogr.



THEATRUM

ARTIS ET HONORIS

INGESTIS MAGNORUM

CASSANUM PHTIS

INGESTIS PHTIS

INGESTIS PHTIS

INGESTIS PHTIS

INGESTIS PHTIS

DOCTORIBUS

INGESTIS PHTIS

INGESTIS PHTIS

INGESTIS PHTIS

INGESTIS PHTIS

INGESTIS PHTIS

ILLUSTRISSIMI, PERILLUSTRES,  
REVERENDI, RELIGIOSI, PRÆNO-  
BILES, NOBILES. AC DOCTISSIMI  
DD. NEO-DOCTORES.



Um Vos sapientiâ & virtute conspicuos  
In publicam gloriæ Scenam Philosophia educit,  
Eloquentia nostra  
Theatrum Virtutis & Honoris pandit.

In quo

Dum Augustis Magnorum Caesarum Filij apparat Spectacula,  
Laurentis Philosophi

Reportatos in arena litteraria triumphos cupit adumbrari.  
Quamquam non solum, ut Vobis applaudat, Eloquentiam ablegamus.  
Geminas illi adjungimus comites,

Ut novum efficiamus chorum Gratiarum, vobis idcirco gratiorem,  
Quodd illa sint scientiæ, Vos verò sapientes.

Una est Ethica, quæ mentem imbuit virtutis honestate;

Altera est Poësis, quæ recreat carminis suavitatem;

Dum Eloquentia persuadet rerum & verborum dignitate.

Huic soli quidem incumbit ex officio,

Ut doceat, deleat, & moveat;

Nolumus tamen omnia uni committere,

Ne videremur socias spernere, cum quibus fœdus iniit,

Olim quidem cum Poëtica, nuper verò cum Ethica.

Accedit,

Quodd optimo consilio ab Ethica humanitatem accipere

Rhetorica voluerit,

Ut Philosophis placeret Austriacis;

Et pedes à Poëtica mutuari,

Ut Peripateticos ad Lauream properantes insequi posset.

Si non assequitur,

Id non illius voluntati, sed vestræ tribuatis velocitati.

Interim

Post emensum stadium Philosophicum sub Lauri frondibus

Quiescite, vivite, valete!

Ita precantur Honori vestro addictissimi

RHETORES VIENNENSES.

**L** Leopoldus Carolus S. R. I. Comes à Zinzendorff, S.C.M. Epheb.

Wenceslaus S. R. I. Comes de Purgstall, S.C.M. Epheb.

Lucius Marchio de Malvetijs, S. C.M. Epheb.

Franciscus Carolus S. R. I. Comes à Pötting, S. C. M. Epheb.

Julius Cæsar Comes Dottori S. R. M. Epheb.

Franciscus Antonius S. R. I. Comes de Weissenwolff.

Leopoldus Christophorus Casimirus S.R.I. Comes de Schallenberg.

Sigismundus Comes Szécsényi.

Bernardus Gerardus Joachimus L.B.deBourscheidt, ex Cæs. Convict. Colleg.

Carolus Josephus Sebastianus L. B. de Pergen, ex Cæs. Convict. Coll.

Ferdinandus Joannes L. B. de Pergen.

Josephus Ignatius Albrecht ab Albrechtsburg, Provincialis.

Josephus Julius Hörman, Provincialis.

Anselmus Franciscus de Schwanenfeldt S. R. I. Eques.

Ferdinandus Antonius Adalbertus de Lafferdt, Eques Silesiæ.

Joannes Christophorus à Rumerskirch, Eques Bohemiæ.

## PRÆNOBILES.

**A**ntonius Marcus Antonioletti.

Antonius Theophilus à Grienfels.

Carolus Josephus, à Raidegg.

Franciscus Josephus Leopold. Lacam.

Franciscus Ludovicus Breitter.

Franciscus Philippus Josephus de Bertram.

Georgius Ludovicus Kirchstetter.

Ignatius Franciscus Schweiger.

Joannes Dominicus Mittermayr de Waffenberg.

Joannes Ferdinandus Leopoldus Gräbner, à Grabensfeldt.

Joannes Josephus à Schmerling.

Joannes Petrus Ignatius Kirchstetter.

Josephus Ignatius Lauch.

Josephus Paulus Pock.

## NOBILES.

**A**ntonius Ferdinandus Schiess nagl.

Antonius Nicolaus Grieblbaur.





# FLAVIUS JULIUS CRISPUS CONSTANTINI MAGNI CÆSARIS NON MINOR FILIUS;

**A** Lactantio Firmiano celeberrimo Oratore

Salubri institutionis lacte, teneris firmatus in annis;

A Parente primo Orthodoxo Imperatore

Eximijs pietatis & fortitudinis exemplis,

Veluti cibo solidiori ad grandia roboratus;

Ipsa in Adolescentia excrevit in Virum:

Ætatis in flore maturos protulit fructus:

Et documenta dedit,

Quòd CONSTANTINI MAGNI sit origine natus;

Dignus Parente Filius, Filio Pater.

Sed jam tempus erat, ut eodem cum Patre niteret honore,

Qui jam pari fulgebat virtute.

Anno igitur CHRISTI nati tercentesimo decimo septimo,

CONSTANTINI imperantis duodecimo creatus est Augustus.

Cujus mensuram nominis ut impleret,

Victorijs Romanum studuit augere Imperium.

Primus gloriæ campus fuit Alemannia,

Semper Heroum vel patria, vel palæstra;

Quæ CRISPI sudoribus irrigata progerminavit laureas,

Et amavit victorem, quem timuit bellatorem.

Alter fuit Asia, in qua iustum exercuit odium contra Amandum,

Qui & suo nomine, & alterius amore indignum se reddiderat,

Quòd amaro in Christianos esset animo.

hunc ergo dum movit, & ventis afflantibus, & Superis aspirantibus;

Vitreo in elemento fortunam fragilem,

Mutabili in oceano victoriam hosti labilem fecit.

Classem inimicam impegit in scopulos,

Et fregit animorum pertinaciam;

Adversas acies submersit in undis,

Et sanguineam in hoste sitim exstinxit,

Gloriosus ex una parte CRISPUS victor Amandi,

**A**

**Dum**

Dum ex altera CONSTANTINUS de Licinio triumpharet.  
Ita Parentem & Filium dignitas pares, belli justitia similes,  
Felicitas & Victoria fecit æquales.

Sed qui pacem foris instauravit, bella domi invenit;

Qui devicit externos, inimicos expertus est domesticos.  
Prostrato hostium furore, pugnandum fuit cum Novercæ amore:  
Vincere tamen non potuit CRISPUM, qui omnia vincit amor.

Induratus militari robore animus  
Nec ad Cypridis ignes potuit emolliri.

Martis arma bene novit tractare;

Arcus & sagittas Cupidinis ignoravit.

Ad hostiles incursus intrepidus, sceleris mentione est territus,

Malens vitam perdere, quàm pudorem,

Et honestè potius cadere, quàm turpiter agere.

Quanquam sic Victor extitit longè maximus;

Quia post reportatas ab alijs victorias vicit seipsum.

Jam ergo Novercæ gravis, quia levis esse nolebat,

Faultæ criminationibus accusatur ut nocens,

Qui ipsa erat innocentia;

Tandémque ferro interimitur Princeps auro pretiosior,

Dignus, ut diutiùs inter mortales viveret,

Nisi jam animi candore immortalitatem meruisset.

Jo! CRISPE triumpha!

Cadendo, quàm stando gloriosior,

Hercule in bello fortior, Hippolyto domi constantior,

Furoris domitor & amoris!

Ut laurus, sic tua virtus noxæ nescia ffordidæ

Intaminatis crescet honoribus;

Tuumque nomen nive candidius

Cantantes sublimè ferent ad sidera cygni.

Sed vix tibi Fausta!

Sæpè in magistrum scelera redierunt sua.

Mox vitam cum nomine infauftâ morte amittes,

Et sanguinem innocenter profusum ardentibus balneis elues,

Tuumque scelus stygio carbone deformius

Clamantes tenebrosa ferent ad Tartara corvi.

FL. JULIO CRISPO  
FAUSTÆ NOVERCÆ INSANE AMAN-  
TIS VICTORI.



*Ille ille Victor Vincitur, marec, Dolet Senec.*

Anteros, seu Anti-Cupido Marte genitus, Erotem, seu Cupidinem vincens exhibetur.

*Anteros. Cupido. Chorus Musarum.*

*Ant.* **I**Mbellis, excors, improbe! an nec tu novum  
Ciere bellum Martiæ proli times?  
Sic me laceffis? vulnus intento mihi  
Minaris arcu? siccine optatam putas  
Te posse laurum ferre, mollito mei



Cordis rigore? Falleris. Nunquam levis  
Penetrabis ictu spiculi, nunquam tuis  
Franges sagittis pectus hoc solido magis  
Adamante firmum. *Cup.* Cede; vel domitus meis  
Jacebis armis. Tela, quæ pharetrâ gero,  
Penetrare nôrunt intimos cordis sinus.  
Vis est Amoris maxima; & polo & solo  
Jus dicitur ille. Nemo bellantem potest  
Superare Amorem; cuncta debellat suo  
Arcu vel igne. Est fortior cunctis Amor.

*Ant.* Nil est Amore imbellius. Vicio favens  
Turpis libido nomen invicti dedit.

Amore vinci mentis ignavæ est nimis.

*Cupid.* Docui Cupido Victor, indomita omnia  
Amore vinci posse; nec fortes pudet  
Subesse Amori. *Ant.* Nempe discrimen leve est  
Amantis, ac amentis; agnoscit suum  
Neuter pudorem, *Cup.* Sponte da victas manus,  
Blandoque Amori cede, ne fiat furor.

*Ant.* Furore vinci maximum sæpè est decus:  
Insano Amori cedere est summum probrum.

*Cup.* Ni cedis, arcum tendo, & Idalias vibro  
In te sagittas; ictus in terram rues.

*Ant.* Non cedo; tela rideo; & forti manu  
Distringo ferrum: victus en humi jaces.  
Non est Amoris summa vis; vinci potest.

*Chor. Mus.* Resonet pæan! ter jo pæan!  
Animo fortis, dextrâque potens  
Martia proles vicit Amorem;  
Arcum repulit, telâque fregit;  
Iram domuit, vimque subegit.  
Resonet pæan! ter jo pæan!  
Qui victores vicerat antè,  
Spicula torquens, ignibus urens,  
Jam devictus procumbit humi;  
Omnia vincens est victus Amor.  
Resonet pæan! ter jo pæan!

FL. JULII CRISPI TESSERA:  
 IRATUS HOMO, NON HOMO.

[Râ, si modum servet, nihil præstantius, si excedat limites, deterius nihil. Necessaria quidem est ex mente Aristotelis; quia, nisi illa impleat animum, & accendat spiritum, vix quidquam expugnari potest. Eâdem tamen utendum est, non ut duce, sed ut milite. Sequi debet, non præcedere rationis dictamen. Intellectus est regere, iracundiæ obtemperare. Nisi hæc illius amplectatur consilium, nil nisi funestum parabit exitium. Non bellum erit, sed latrocinium; non pugna, sed clades; non honesta victoria, sed tyrannis barbarica, ubi illa cæterorum affectuum ducet exercitum. Quemadmodum *Dijis proximus ille est, quem ratio, non ira movet*; (a) ita belluis affinis est, cui ira, non ratio dominatur. *Ferini enim ira est ingenij*, ut censet Euripides; à Basilio verò *anima ebrietas, & Fera truculenta* nominatur. Oris, quæso, tui, corporisque habitum in speculo contemplare, quando nimio effervesceis furore. Micas oculis, ardes genis, ore spumas, voce strides, frendes dentibus, supercilia erigis, horres capillis, complodis manus, pedibus humum pulsas, curris, recurris, vociferaris, tumultuaris, corpus varijs distorques modis, horridasque ingenti fremitu minas intentas, funera spiras, cædes machinaris. Quid quæso in hac tota forma humanum est? An domi jus dicat dominatrix Ratio, quando sic famulæ Potentiæ debacchantur? Ira velut rabidus canis est; nisi catenâ vincias, obvios quosque latratu impeter, morsu sauciabit. Equus est; nisi fræno coërceas, sessorem ipsum facile exturbabit. Leo est; nisi cicurem reddas, quò est fortior, eò erit crudelior. Nunquam tantas habuisset orbis tragœdias, nisi Furor cothurnum induisset. Nunquam tot florentissimæ urbes & Provinciæ abiissent in cineres, nisi immodicus animi effervescentis ardor prorupisset in incendia. Nunquam violentâ morte prostrati eundem in tumulum concidissent Reges & subditi, nisi truculento Marte

(a) *Claud. in Manl. conf.*

armata rabies insanos excitasset tumultus, & more belluino in homines  
 sæviſſet. Alexander Macedo Calliſtheni, aliſque familiäribus vitæ  
 lucem non ademiffet, niſi prius rationis lumini iracundia tenebras of-  
 fuſiſſet. Neque Theodoſius Imperator in ſanguineam Theſſaloni-  
 cenſium innocentium cædem prolapſus fuiſſet, niſi præceps furor  
 mentem vertigine rotâſſet. Hic tamen expiavit pœnitentiâ, quod  
 deliquit iracundiâ, illuſtrius deinceps ſemper exemplum manſuetæ  
 humanitatis, quàm ſemel fuerat barbaræ feritatis. Imò, ne ruruſus  
 fera erumperet, alienis forſan irritata vitij, eam fortiori alligavit vin-  
 culo, dum legem ſtatuit, ne ſententia de bonorum publicatione, aut  
 cæde hominum prolata ante diem trigeſimum ſortiretur effectum.  
 Dignum ſanè authore Ambroſio, executore Theodoſio ſtatutum! *Pos-  
 teſt enim ſemper pœna dilata exigi, non poteſt exacta revocari. Optimum ira  
 remedium mora eſt,* ut inquit Seneca Ethicus. (b) cui conſentit Tragœ-  
 clus: *Da tempus ac ſpatium tibi: quod ratio nequijt, ſapè ſanavit mora.* (c)  
 Quòd ſi iram nullo modo poteſ frænare, quâ ratione audebis regnare?  
 Rex eſſe non poteris, niſi prius regas teipſum; neque imperium tenere  
 in alios, niſi tibi didiceris imperare. Si immanitate vel feras ipſas terre-  
 re poſſeſ, quomodo hominum animos tibi devincieſ? Quî dignus  
 eris ſubditorum obſequio, ſi indignum te reddiſ humano conſortio?  
 Furijs inter inferos Poëtæ locum dederunt; mitiores Deas ad Parnaſ-  
 ſum, vel ſidera extulerunt. Ipſa veritatis teſtis hiſtoria cruentos Ne-  
 rones, sævientes Diocletianos deteſtatur; clementes Titos, manſue-  
 tos Trajanos commendat. Ara refugij, Princeps ſic oportet: quiſ  
 illuc ſupplex accedet, ſi Jovem timeat fulminantem, condonantem  
 nunquam ſperet? Portus ſic: quiſ illuc fluctuantem appellet navicu-  
 lam, ſi novam exſpectet tempeſtatem! Medicum ad procurandam  
 Reipublicæ ſalutem conſtitutum ſe meminerit: quiſ veniet petiturus  
 remedium, ſi graviora vulnera pertimeſcat? ſapientiffimum profe-  
 ctò Aureliani Cæſaris ſymbolum eſt. *Quò major, eò placabilior.* Sic  
 enim non tantùm hominibus, ſed ſeiſpſo major Rex erit, ſuperiſque  
 fiet æqualiſ. Atque hoc eſt, quod Poëta Claudianus Honorio Cæ-  
 ſari occinuit:

*Sis pius imprimis; nam cùm vincamur in omni  
 Munere, ſola Deos æquat clementia nobiſ. (d)*

AR.

(b) Sen. l. 2. de ira. (c) Sen. in Agam. (d) Claud. de 4. Hon. conſ.



# ARCADIUS ET HONORIUS THEODOSII MAGNI CÆSARIS FILII,

Cum sanguine virtutem traxêre à Parente;  
Ut meritò dubitare possis,

An ad præclara facinora ex pijssimo Imperatore nati,  
Vel optimâ Arsenij institutione fuerint efformati.

ARCADIUS tenera in ætate flori omninò similis,  
Anno CCCLXXXIII. ipsa in hyeme ampliùs cœpit vernare,

Quando à Patre in quintum annum imperante

XVII. Calend. Februar. Cæsar est appellatus.

Quem post decennium secutus est HONORIUS,

Ne nomen inane gereret,

XI. Calend. Decemb. ejusdem consors honoris factus;

Opportuno sanè consilio,

Ut tum novum in Imperio lumen accenderetur,

Cùm Sol in cœlo horrendâ eclipsi involveretur.

THEODOSIO vitâ functo

Unus Orienti, alter Occidenti præfuit,

Diviso primùm Imperio

Non per Fratrum discordiam, sed ultimam Parentis voluntatem.

Geminos tum in mundo Soles radiare crederes,

Ita Constantinopoli ARCADIUS, Romæ effulsit HONORIUS;

Ostenditque uterque non totum obiisse Parentem,

Qui superstes esset in Filijs.

Rempubicam, quam ambo tranquillam accepêre,

Deprehenderunt mari esse similem,

Cujus malacia ventorum flatu facilè dissipatur.

Inflati nempè ambitione Proceres perturbârunt Imperium,

Ut faciliùs in turbido Cæsareum diadema piscarentur.

Tutores juniorum Cæsarum à THEODOSIO constituti,

Ruffinus ARCADIJ, Stilico HONORIJ,

Oppugnare cœperunt, quos defendendos susceperant,

Volentes ijs dominari, quibus parere debebant.

Vocato in auxilium Alarico Gothorum Rege,

Ad honorem, qui virtuti debetur, scelere grassari volebant,

Ign-

Ignari, quòd violenta nemo Imperia continuit diu.  
Quamvis nec eò pervenerint, quò tendebant.

Sanguineus ad dignitatem callis lubricus est:

Hunc tenuerunt, propterea ceciderunt,

Consuetam ambitiosorum ludentes Tragœdiam,

Qui tolluntur in altum, ut lapsu graviore ruant.

Ruffinus, qui ARCADIÎ purpurâ libenter rubuisset,

Cæsus à militibus miserè expalluit.

Stilico, qui Cæsare major esse voluerat,

Jussu HONORIÎ factus est capite minor.

Sic extinctis utrinque sibi rebellibus,

Propriâ virtute, & Parentis optimi excitati exemplis,

Ad eos perdomandos convertère animum,

Qui Deo erant perduelles.

Gentiles & hæreticos publicis edictis persecuti sunt;

Si hoc est persequi,

Dæmonem velle eripere, ut Deum possint dare.

Fana idolorum diruerunt, ut summo Numini templa assurgerent;

Dejecerunt monumenta scelerum, ut virtutis trophæa statuerentur;

Falsitatem deprefferunt, ut veritas erigeretur.

O quàm prosperè

His Favonijs aspirantibus, his sideribus radiantibus,

Varias inter tempestates Petri navicula processit!

His nixa fulcris, his sustentata columnis,

Contra Paganorum insultus, contra Donatistarum impetus

Quàm secura stetit Ecclesia!

Sed fortissima tandem fulcra ceciderunt,

Occubuerunt propitia sidera,

Venti faventes spirare cessârunt,

Quando desierunt vivere,

ARCADIUS anno ætatis XXXI. HONORIUS XL.

Ille citiùs, Hic diutiùs Imperator.

Verùm cur dixi expirasse, occubuisse, cecidisse?

Spiritus enim eorum remansit in successore Theodosio II.

Virtus in perpetuas fulget æternitates;

Nominis gloria adhuc in Oriente & Occidente

Perennat.

ARCADIO ET HONORIO,  
FAVENTIBUS ECCLESIAE CÆSA-  
RIBUS,



*At ille sollicita sidus utrumq; rati. Ovid.*

Castor & Pollux propitia navigantibus sidera repræ-  
sentantur.

*Navarchus. Castor & Pollux.*

*Navarch.* **E**Xpando vela; littore relicto, tremens  
Periculosas æquoris tento vias.

Nunc semisomnis unda compositis quidem  
Jacet procellis, murmur Aquilonum silet,  
Etesiarum gratus aspirat favor,

B

Celer-



Celerique nostram promovet cursu ratem.  
Sed quis perennem Nerei speret fidem?  
Nil levius undâ, servat æternas vices,  
Constânsque in inconstantia pontus manet.  
O quàm repentè turbo conglomerat truces  
In axe nubes, solis exstinguit jubar,  
Diémque nautis eripit! sequitur poli  
Murmur tonantis; igneus subitis micat  
Flammis Olympus; Jupiter telum jacit,  
Et fulminante dexterâ mundum quatit.  
Quàm sæpè clausas Æolus laxat fores,  
Viámque ventis pandit? Hi toto statim  
Furore vasti regna Neptuni petunt,  
Et præliantùm more vesanos cient  
Undique tumultus. Celsa jam tumidos levant  
Ad astra fluctus, ima mox iterum nigri  
Ad antra Ditis deprimunt. Mixtus Notis  
Bacchatur Eurus, Aquilo cum Cauris furit,  
Africus & Auster stridet, ac totum sua  
De sede pelagus turbine insano movent.  
Ambigua varijs interim nutat ratis  
Jactata ventis, fluctuat dubijs maris  
Territa procellis, jamque sub streperis timet  
Undis sepulchrum. Tanta ne nostram premant  
Pericla navem, ne tonet polus, fremat  
Pontus, furátque ventus, ô Superi date  
Nobis benigni! Precibus aspires polus!

*Cast. & Pol.* Secura perge cymba; nil rabidos time  
Ponti furores. Stella, quam rutilis vides  
Utriusque radijs splendidam, solis jubar  
Tibi serenum faciet, & placidam maris  
Dabit quietem; nostra lux nautis favet.

*Navarsh.* O fausta nobis sidera! ô stellæ bonæ!  
Fulgete cœli lumina, & nautis dein  
Semper faventes spargite è cœlo faces.

# L E M M A T A

ARCADII: SUMMA CADUNT SUBITO.

HONORII: MALE PARTUM MALE DISPERIT.

**M**agna placent hominibus, displicent modica. Vileseunt infima, summa æstimantur. Despiciuntur valles, montes suspi-  
ciuntur. Vix aliquis inter myricas locari sustinet; quilibet inter ce-  
dros vel pinus vult eminere. Quàm pauci sunt, quos, licèt sint ter-  
ræ filij, delectet ambulare in terra! Ad astra scandere, stellis propio-  
res esse contendunt ferè universi more Gigantum. Sed nescitis, quid  
petatis, quicumque sublimia appetitis. Mons reliquam quidem ter-  
ram celso excedit fastigio, sed nunquid *feriunt celsos fulmina colles?* (a)  
Cedrus & pinus frondoso vertice supra cæteram arborum turbam  
extolluntur; sed nōne *sapius ventis agitatur ingens pinus?* (b) Amœnâ  
lucis serenitate intuentium oculos astra scintillantia in se convertunt;  
sed nōne sæpè obducuntur caligine, & *nubibus atris condita nullum  
indere possunt sidera lumen?* (c) Sublimes honorum apices, amplissima-  
umque culmina dignitatum communem mortalium conditionem  
longè superant; sed nunquid *plus habent ponderis ad ruinam, qua cæteris  
sunt altiora?* (d) Inter Orientem honoris & Occidentem vix aliquando  
tantum interest temporis, quantum est inter solis ortum & occalum.  
*ma permutat brevis hora summis; quem dies vidit veniens superbum, hunc  
ies vidit fugiens jacentem.* (e) Fortuna telis nemo magis expositus,  
quàm qui maximè sublimis. Ut felicitis & infelicitis nomen unâ tan-  
tùm inter se syllabâ discrepant, ita sors summa & infima quandoque  
ino solùm à se invicem passu distant. Quò ascensus est difficilior,  
ò descensus est pronior. Facile est in terram ruere, alt iterum resur-  
gere hic labor, hoc opus est. *Ardua per praeceps gloria vadit iter, ut  
poëta canit;* (f) unde facile pes euntis fallitur, & spes in ima de-  
volvitur. Dic, ubi constitit Phaëton, qui solis æmulus auream  
ræsumpsit regere lucis quadrigam? *Patrijs excidit altus equis.* Ubi

B 2

Icarus,

(a) Sen. in Agam. (b) Horat. (c) Boët. (d) Lactant. (e) Sen. in  
Terc. Fur. (f) Ovid, 4. trist.

Icarus, qui novo pennarum artificio ad sublimia evolavit? *Icarus nomine fecit aquas.* Sed quid Poëtarum scrutamur umbras, dum clarissimum nobis historiæ lumen afulget? Plures summæ fortunæ in infimam mutatæ catastrophas singula dedêre sæcula, quàm ut omnes recenferi possint. Quis in aula Tiberij Sejano potentior? Et tamen, quo die à Senatu honorificè deductus fuit, eundem populus in frustra crudeliter divisit. Quis Belisario post multas de hostibus reportatas victorias gloriosior? Et tamen omnem cum oculorum luce nominis splendorem amisit, & factus est *Irus subito, qui modò Cræsus erat.* (g) Quis Valeriano in Cæsarei honoris culmine constituto sublimior? Et tamen eò depressus est, ut Regi Persarum equum consensuro collum & humeros submiserit. Verissimum nempe est, quod Poëta Tragicus asseruit. *Sidunt ipso pondere magna, ceditque oneri fortuna suo.* (h) Quòd si scelere tibi peperisti honores, plus habes, quod metuas; quia malè parta malè dilabuntur. Si per aliorum ruinas ad dignitatis fastigium evasisti, cave, ne ruas in foveam, quam alteri fecisti; semper enim tragica est improborum felicitas. Si injusto ferro auream tibi comparasti fortunam, fide, si vis, sed cui, vide. Iniquitas mole suâ gravis est; Fortunam per se leviter stantem facilius in casum impellet, ut te cadendo opprimat. Ab honesto (si nescis) dictus est honor; crimina averfatur: bonos sponte, malos sequitur invitè. Diu stare non potest, quæ aquiritur sine æquitate felicitas, quia caret fundamento. Si non est alia gloriæ aurora, quàm culpa, occasum ab ortu, noctem à die non multum abesse deprehendes. Si Virtus ipsa ad firmandam sortis inconstantiam non semper sufficit, quid scelera facient? Nemo profectò sapientior illo, qui non ambit gloriam, sed virtutem. Juxta Tacitum enim *gloria virtutis pedissequa est*; & ex Plutarchi sententia, *eximiam virtutem sponte sequitur suam decus.* Romani templum honoris junctum voluêre templo virtutis, ut nemo posset illud intrare, nisi prius hoc subisset. Nempe bene ad summos sic itur honores; securiori tramite eò non pervenitur. Quisquis ergo sis, esto optimus, ut possis esse maximus. Imò major es, si honorem mereris, quàm si non meritis honoraris. Qui jacet, apprehendat virtutem, ut erigatur. Qui stat, videat, ne cadat.

LU.

(g) Ovid. 3. trist. (h) Sen. in Agam.



LUDOVICUS A DEO DATUS,  
EX CAROLO MAGNO CÆSARE ET  
HILDEGARDE NATUS,

A D omne bonum à teneris educatus,  
Suâ virtute Pij cognomen,

Parentis jussu Cælaris nomen accepit,

Anno salutis humanæ per CHRISTUM reparatæ DCCCXIII.

Imperij Occidentalis per Carolum restaurati XIV.

Aquisgrani insignitus Augusto diademate reliquit dubium,

An dignitate, vel pietate esset insignior.

Ut firmitus suum redderet Imperium,

Illud in Petra Romana voluit stabilire.

Ne ipso imperante langueret membris Ecclesia;

Ejusdem caput servavit incolume.

Parenti Fidelium Pius Filius,

Leoni III. succurrit LUDOVICUS I. eventu secundo;

Quia Pontifici securitatem, Romæ pacem, Ecclesiæ tranquillitatem

Pietate suâ restituit, quam aliorum impietas sustulerat.

Quietem nempe ademit sibi, ut daret alijs;

Laboravit in terris, sed pro cœlo;

Summam adhibuit potentiam, sed pro omnipotentis gloria;

Politicam gessit majestatem, sed ad rerum sacrarum authoritatem.

Sub Cælaris purpura religiosum occultans animum,

Ostendit, curam Dei & populi,

Regni & Fidei, Aulæ & Ecclesiæ

Bene convenire in Principe, unâque in sede morari.

Cùm ipsi Ecclesias non liceret regere,

Curavit, ut ab alijs sedulâ curâ regerentur.

Idcirco plura Antistitum procuravit concilia,

In quibus infirmis membris adhiberetur medicina,

Putrida gladio spiritûs resecarentur,

Et serpens tacitè pestis opprimeretur citius,

Quàm latius grassaretur.

In mundo nil nisi cœleste sapiens,

In Aula nil nisi sanctum cogitans,

Terram cœlo parere, cœlum terris invehere satagebat.

Hinc varias in urbes dispersit Divorum reliquias,

Ut

Ut ijs venerationem colligeret,  
Perversosque mutaret hominum animos,  
Quibus tam sancta corpora donarat;  
Homo omnino dignus adscribi Cælitibus,  
Qui Cælites hominibus immiscebat.  
Nondum tamen hic substitit Pietas LUDOVICI;

Plus ultra progressa est,

Et facta pretiosior, quando auro comitante processit.

Exhaustit enim arcas, ut aras locupletaret;

Minuit ærarium, ut augeret sanctuarium;

Aulæ nitori detraxit, ut posset addere templorum splendori,

Usque ad naturæ negligentiam, & suæ oblivionem fortunæ,

Divinæ memor magnificentiæ.

Nil tamen inde jacturæ passus est,

Quia quæstiosa est pia in cælum liberalitas,

Et quæ Deo dantur, servantur opes.

O quantæ tunc in orbe Cæsarum Antitheses!

In Oriente regnabat Leo natus in Armenia,

In Occidente imperabat Agnus oriundus è Francia;

Ille sacrarum imaginum hostis, iste defensor;

Ille Ecclesiarum direptor, iste instaurator;

Ille exturbator Sacerdotum, iste propugnator;

Ille bellæ non absimilis, iste similior Angelo;

Ille difficilis ad veniam, iste non facilis ad iram.

Nam filios Absoloni rebellanti pares expertus,

Davidis mansuetudinem est æmulatus,

Nullius rei magis, quàm iræ suæ Dominus,

Sempërque ad veniam promptior, quàm ad pœnam.

Sed quò mitior in alios LUDOVICUS,

Tantò in eum Fortuna fuit acerbior;

Fortassis, ut velut aurum igne, sic virtus adversis probaretur.

Denique nec Mors clementi, Piòque Cæsari pepercit.

Lætissimo tempore maximum Germaniæ luctum attulit,

Quando in Majo rapuit LUDOVICUM.

Verùm quid plangis Germania?

Humana erga te, non inurbana Mors fuit.

Florem tuum decerpit, ut transferret in cælum;

Quia in terris cœlestem spiravit odorem.

LU.



# LUDOVICO PIO SUMMI PONTIFICIS DEFENSORI,



*Hic pietatis honos: sic nos in scestra regonis. virg.*

Apollo Jovi à Gigantibus oppugnato succurrens  
proponitur.

*Gigantes. Jupiter. Apollo.*

*Enceladus.* **E**Rgône semper desides, Superûm gravem  
Feremus iram? murmure insano fremens  
In nos tonabit Jupiter, sparget faces,  
Et fulminante dexterâ nostram petet  
Cervicem inultus? Ille dominantî manu  
Semper serenas siderum domos reget,

Dum



Dum nos tenemus infimas terræ casæ?  
Ad bella focij! tecta stellantis poli  
Pulsemus armis; prælia inimico Jovi  
Moveamus omnes. *Briareus*. Ignem Astrorum procul  
Recedat aulâ, sceptrâ, quæ manu rotat,  
Multo corusca lumine, & nitidis thronum  
Stellis serenum, quôque mortales premit,  
Nomen Tonantis perdat; invisus dein  
Toto vagetur orbe, & optatos diu  
Nobis relinquat Jupiter cœli lares.

*Mimas*. Ergo audeamus aliquid. Audaces juvat  
Fortuna, timidos deserit. *Typhæus*. cælum novâ  
Scandamus arte. Montium summos loco  
Moveamus, Ossæ Pelion, Olympi jugis  
Rupem aggeramus Caucasi, ut celsas poli  
Tangamus arces. *Jup*. Quantus in terra fragor  
Auditur! alti concidunt scopuli, ruunt  
Ubique saxa, montium crescunt juga  
Adusque cœli Regiam. Insanus furor  
Hic est Gigantum, qui mihi bellum movent.  
Cedite superbi; vel meâ vestrum scelus  
Mox vindicabo dexterâ. Fastu nihil  
Magis Tonanti displicet. *Encel*. Magis Jove  
Nihil Tonante displicet. Trifidas manu  
Nos fortiore facilè rapiemus faces.

*Apollo*. Sacrilega turba! Maximum sictu colis  
Superûm Monarcham? siccine ultrices Dei  
Contemnis iras? Stet suum Jovi decus,  
Et pereat orbis. Cadite scelerati meis  
Icti Sagittis. *Jup*. Cadite fulmineâ Jovis  
Flammâ perusti. *Encel*. Vindicem summi manum  
Sentio Tonantis. *Typh*. Me potens Phœbi premit  
Jaculantis arcus. *Apol*. Deprimi ad Avernum decet,  
Quos usque ad astra contumax fastus levat.

*Jup*. Impunè Superis prælium nemo movet.

# LUDOVICI PII INSCRIPTIO: OMNIUM RERUM VICISSITUDO.

Quàm bene universa rerum creatarum machina orbis appellatur! Rotunda est, rotæque similis, continuò volvitur. Terra quidem firma stat; quæ tamen super terram sunt, rotantur omnia, & rebus cunctis (ut verbo Tacitus, re docet experientia) quidam velut orbis inest. Lux & tenebræ, dies & nox, ver & hyems, calor & frigus, tempestas & serenitas mutuâ sibi invicem alternatione succedunt. Nec minor est mutatio in fortuna, quàm sit in natura, hoc tamen discrimine, quòd natura certâ lege, fortuna nullo ordine varietur. *Fortuna nunquam sistit in eodem statu; semper movetur, variat & mutat vices, & summa in imum vertit, ac versa erigit.* (a) Continuus hic in mundo cursus est, ut succedant tristia latis, amara dulcibus, adversa prosperis, infima summis. Honores facilè deprimuntur ad ignominiam, divitiæ exhauriuntur ad inopiam, voluptates desinunt in tristitiam, magni nominis fama minuitur per contemptum, vita ipsa cum rerum omnium cumulo facillimè in tumultum collabascit. Ita nihil est ab omni parte beatum. (b) Pacis tranquillitatem turbant bellorum tumultus, florentem urbium, regnorumque felicitatem pessundat Martis ferocia, ut, ubi steterunt Pergama, nunc fluctuent aristæ. Hic vetusta regna concidunt, ibi nova surgunt imperia. Illic priscae oblitterantur Majorum imagines, alibi recentes nobilitatis ceræ efformantur. Qui non unam de hoste prostrato tulere victoriam, mutatâ repentè belli aleâ victi ducuntur in triumphum. Nonnunquam dum una ex parte Abdolonimus ex horto ad Regnum, Tullus Hostilius à caula ad aulam, Bamba ab aratro ad sceptrum evocantur, parte alterâ vel Dionysius Syracusanus à regendis populis ad castigandos in trivio pueros ablegatur, vel Rufinus & Stilico efficiuntur omnium minimi, qui erant maximi, & uno tantum Cæsare minores. Ita fors omnia versat. (c) Neque bona ulla sunt, quæ malorum confinio non lædantur; quidquid de Polycrate Samiorum Tyranno in contrarium admirabunda declamet Antiquitas. Tantâ hunc usum dicunt felicitate, ut

C

nullum

(a) Anson. in Epigram. (b) Horat. (c) Virgil.

nullum infelicitatis argumentum in tota potuerit vita reperire. Cre-  
 dat hoc, quisquis volet. Qui miserâ, in trabe suspensus, morte perijt,  
 eum semper fortunatum vixisse nego. Dissimulare potuit infelicitatem,  
 à se remove non potuit. Eadem olim fuit, quæ nunc est, ac  
*passibus ambiguis Fortuna volubilis errat, & manet in nullo certa tenaxque  
 loco: sed modo lata manet, vultus modo sumit acerbos, & tantum constans in  
 levitate sua est.* (d) Fortuna nempè est veluti luna: crescit & decrescit.  
 Est flori similis: vernat & marcescit. Est instar fulguris: lucet & eva-  
 nescit. Mel propinat, sed felle mixtum. Aurea porrigit munera, sed  
 quæ ferrea non rarò invehunt funera. Blanditur amore, sed mox  
 sævit furore. Dulci cum Sirenibus cantu, & amœnis jocatur oculis,  
 sed miseros dein in planctu, & adversitatum destituit scopulis. Tot  
 tamen inter rerum vicissitudines, variâsque feliciû & infeliciû ca-  
 suum alternationes in animum nihil potest Fortuna. Nisi tu velis,  
 illum non mutabit, licet mutet omnia. Bona reliqua invito potest  
 rapere; quæ in animo sunt, eripere non potest, nisi volenti. Illa spon-  
 te non dimitte, sic nunquam succumbes fortunæ. Sagittæ, quas il-  
 la jact, vel divitias, vel nomen, vel corpus attingunt, animum non  
 penetrant, nisi tu ipse viam pandas. Insuperabili is loco stat, arce  
 suâ se continet, infra illum omne telum cadit, modò tu non cadas  
 animo. Fac ergo, animo forti, magnoque sis, seu sole sereno ful-  
 geat, seu fulmina cœlum mittat. Sic Fortuna serviet, tu imperabis,  
 variatâ non mutaberis, cadente stabis. Faventi ne fide, furenti ne  
 cede; bonam rege, malam vince. Non extollaris in prosperis, nec  
 deprimaris in adversis. Si lenes aspirent Favonij, noli nimium vela  
 laxare; si rigidi fremant Aquilones & Africi, noli de portu desperare.  
 In rebus secundis adsit moderatio Vespasiani Cæsaris, in sini-  
 stris fortitudo Zenonis Philosophi. *In illo, licet communi omnium con-  
 sensu diceretur Imperator, (teste Tacito) nihil tumidum, arrogans, aut in  
 rebus novis novum fuit.* (e) *Iste (authore Seneca) nunciato naufragio, cum  
 omnia sua audiret submersa, nihil commotus, jubet, inquit, me fortuna expe-  
 ditiùs philosophari.* (f) Ad Principes nempè & sapientes maximè perti-  
 net, non regi fortunâ, sed illam regere; & qualiscunque ea demùm  
 sit, semper aliquid memorabile, magnoque dignum animo efficere.  
*Magni viri nesciunt succumbere fortuna.* (g)

OTHO

(d) Ouid. *ſ. trist.* (e) *Lib. 2. Hist.* (f) *L. 1. de tranq.* (g) *Sen. l. 4.  
 declans.*



# OTHO

## OTHONIS MAGNI CÆSARIS FILIUS,

**I**ndole major quàm ætate,  
Animo maturior quàm annis,  
Pectoris magnanimitate validior, quàm robore corporis,  
Jam tum in summo honoris culmine constitit,  
Quando alij vix scandere incipiunt.  
Ne scilicet fatigato jam laboribus Atlante Magno Cæsare  
Romanum nutaret Imperium,  
Novus ferendo oneri suffectus est Hercules.  
Ne inter tumultuantes tum Europæ procellas  
Funesto Germania involveretur naufragio,  
Si Palinurum repentinus mortis somnus opprimeret,  
Alius, qui clavum moderaretur, constitutus est navarchus.  
**OTHO** parens enim **OTHONEM** Filium Cæsarem esse voluit,  
Anno Imperij sui **XXXI.** nati Salvatoris **DCCCCLXVII.**  
Ne, si ipsi mors vitam raperet, simul Imperio felicitatem eriperet,  
Et membra sine Capite inter se dividerentur.  
**OTHO** ergo à Parente nominatur,  
**A Joanne XIII.** Romæ coronatur Imperator,  
Et quidem in Natali Domini,  
Ut inde dignitatis Cæsareæ exordium duceret,  
Unde orbis universus salutis sumpsit principium;  
Meminissetque  
Et nato Salvatori, & facto Imperatori hoc esse commune,  
Ut uterque gloriam Deo, pacem procuret hominibus.  
Geminum hoc munus implere conatus est,  
Ne nomen, quod in Parente erat magnum, minueret;  
Ne dignitatem, quam nascente justitiæ sole acceperat, obscuraret.  
Quia tamen pacem obtinere non potuit, nisi ferro,  
Ferream agere ætatem coactus est, qui auream maluisset,  
Non heroicæ defectu virtutis, sed publicæ affectu tranquillitatis,  
Sciens ijs tantum pacem deberi, qui bonæ essent voluntatis,

Illis arma intulit, qui mala volebant,  
Generosa malens pericula, quàm periculofam fecuritatem.  
Sensêre hoc Galli,  
Qui è nido suo Aquisgranum usque provolantes  
Leones Alemannicos nequicquam terruerunt;  
Imò pennas amiserunt in Germania,  
Ut poenas darent inconsultæ temeritatis.  
Vices nempe Lothario Regi reposuit OTHO Imperator,  
Illatam Germanis injuriam Gallico cruore expians,  
Et Francieis incendijs Teutonicum nomen illustrans.  
Parisijs usque, unde egressa Lotharij audacia,  
Progressa est OTHONIS Victoria,  
Docuitque, nunquam Aquilas à Gallis impunè irritari.  
Pace domi restitutâ extra patriam processit,  
Non ut bella moveret, sed mota componeret,  
Et defenderet Latinam fidelitatem contra Græcam perfidiam.  
Cum Sarracenis Calabriam, Apuliâque vastantibus  
Primùm felici, dein adèò infautâ lussit belli aleâ,  
Ut cum milite victoriam, & demum libertatem amiserit  
Vinctus à nautis, qui victus erat ab hostibus.  
Animum tamen inter hæc non perdidit Cæsare dignum;  
Hinc reliqua facilè recuperavit,  
Auro libertatem, stipendijs militem, fortitudine victoriam.  
Iterum progressus in Sarracenos  
Sudore Martio fugæ labem eluit,  
Et nuper attritam hostili sanguine purpuram decoloravit,  
Victor inde gloriosior, quod vincentes vicerit,  
Eósque penitùs deleverit, à quibus totus superari non potuit.  
Victoria hæc novum illi nomen peperit,  
Ut diceretur PALLIDA MORS SARRACENORUM;  
Dignissimus, ut diu viveret, postquam hostes ita mori coëgisset.  
Sed, quam immisit in alios, in se quoque mortem concitavit,  
Multo sanguine jam ita efferatam, ut nec Victori parceret.  
Morti ergo, non hostili Marti succubuit,  
Anno post Parentis obitum undecimo,  
OTHONE Magno minor non futurus,  
Si longior superfuisset vita, & melior fortuna favisset.

OTHO.

OTHONI JUNIORI  
SARRACENORUM DOMITORI,



*Virtutis est domare, quæ cuncti pavent. Sen.*

Perseus de Medusa triumphans in Scenam datur.

*Perseus. Agonotheta. Medusa.*

*Pers.* **J**AM Martialis bullit in vènis cruor,  
Totùmque pectus igne generoso calet.  
In bella fervet animus. Egregiam lubet  
Pugnando laurum quærere, & pulchrum mihi  
Parare nomen inter illustres viros.  
Medusa, Phorci genere truculento sata,



Immane monstrum, pestilens mundi lues,  
Odium Minervæ, capite quæ Stygios gerit  
Crinita colubros, atque Avernales manu  
Furente tædas concutit, titulus mei  
Erit triumphi. Victa victoris mihi  
Nomen relinquet. *Agon.* Ergo Gorgoneæ nihil  
Caput Medusæ viperis cinctum times?  
Impunè nullus hæctenus Furis trucid  
Fodicavit iras. Fœmina hæc vicit viros.

*Perf.* Quid inde? forti ex hoste laus major venit.  
Virile robur sæpè fœmineus furor  
Dolûsve vicit: noster ast animus gravi  
Est major irâ, major occulto vafra  
Mulieris astu! Marte de me non feret,  
Nec arte palmam. *Agon.* Certat aspectu; time;  
Videre vinci est. *Perf.* Certet aspectu; manu  
Ego dimicabo; fortè nec visum caput  
Collo revellam. *Agon.* Cœlites faveant boni,  
Et placida dexteram Astra ferientem regant.

*Perf.* En ipsa prodit Gorgonum Princeps, probrum  
Infame mundi! lumina avertam, manum  
Armabo, tacito terga præeuntis pede  
Insequar, & ense demetam anguicomum caput.  
Ictum secudent Numina, ut monstrum cadat,  
Nostrâsque tandem liberet terras metu.

*Med.* Quis est Medusâ fortior? quis me magis  
Illustris Heros? Dexterâ haud opus est mihi  
Rotante ferrum; frontis aspectu truci  
Victrix triumpho; vultus exarmat viros;  
Vidisse me est perijsse. *Perf.* Truculenta, impia,  
Atrox, cruenta! scelera sic jactas tua?  
Peri execranda; regna Plutonis pere,  
Ibique tristi jungere Eumenidum choro.  
Bene est! reciso vertice examinis jacet  
Medusa. Tantum Persei virtus potest.

*Agon.* Jo triumphè! posse truculenta omnia  
Virtute vinci Perseus victor docet.

# OTHONIS JUNIORIS EPI- GRAPHE:

PACEM CUM HOMINIBUS, CUM VITIIS BELLUM.

Quantæ (Deus immortalis!) singulis ferè sæculis bellorum tempestates in mundo desævière! Quàm vehemens Martij furoris turbo urbes & oppida commovit! Quanta militum armatorum nubes regiones obtexit & provincias! Quàm densi telorum imbres campos opplevère! Quàm crebra ensium strictorum fulgura coruscârunt! Quàm tremenda in gentes & populos mortis cruentæ fulmina summi Regnorum Joves detorserunt! Et quorsum hæc omnia? Nimirum ut suæ timorem incuterent potentiæ magni Principes, subditisque æquè ac hostibus nomen Regium fieret tremendum, & veluti Jovem fulminantem, sic Regem ferro grassantem paverent universi. Quantæ (Superi boni!) omnibus propè mundi ætatibus conscriptæ legiones, dispositæ phalanges, exercitus collecti! Sesostris Ægyptius sexcenta peditum millia, equitum vingiti quatuor, curruum ad bella paratorum octo & viginti millia numeravit. Xerxes Persarum Rex ad prælium navale plures nongentis millibus bellatores, ad pugnam terrestrem centum & septuaginta octo præliantium myriades eduxit. Ninus Assyrius in Bactrianos pugnaturus decies septies centenorum millium in turmis pedestribus, equestribus in copijs ducentorum millium numerum adæquavit. Et quorsum tam numerosæ acies, tam copiosa militum agmina? nimirum ut homo homini lupo fieret, unusque alterum insequeretur, vulneraret, trucidaret. Itane in mutuam ardetis perniciem mortales? Siccine, qui humanitatem geritis in nomine, opere plus quàm ferinam immanitatem exhibetis? Ad interrogationem Horatij respondete. *Quò, quò scelesti ruitis? aut cur dexteris aptantur enses conditi. Neque hic lupis mos, nec fuit leonibus unquam, nisi in dispar, feris.* (a) Quòd si tamen innatus vos urget certandi ardor, ostendam, cum quibus pugnare fortiter, quos feliciter debellare possitis. Non in homines, sed in vitia insurgite; Il-



liamorem, ista odium promerentur. Cum illis sancite pacis fœdera, cum illis æterna gerite armorum & animorum dissidia. Utî juxta Martialem *licuit semperque licebit parcere personis, dicere de vitijs*; Sic licuit, semperque licebit personas diligere, earundem vitia insectari. Imò, ut pacem suis in regnis procurent Principes, cum vitijs semper bella gerant, est necesse. Crudelis est clementia, quæ mavult palpare vulnera, quàm curare. *Maxima enim illecebra peccandi est spes impunitatis.* (b) Idem vitibus ingenium & vitijs; exuberant, ni falcem sentiant. Nocet innoxijs, qui nimium parcat nocentibus; quia *facile serpunt vitia, & in proximum quemque transiliunt, & contactu nocent.* (c) Fortunata illa Respublica, in qua nulli vitio licet impunè grassari; infelicissima, quæ peccatorum pondere premitur, quia tandem ad ima deprimetur. Tragœdi effatum est: *Ubi non est pudor, nec cura juris, sanctitas, pietas, fides, instabile regnum est.* (d) Quòd si quis clementis nomen ambiat, nil timeat, quia hoc puniendo non amittet. Potest enim iratus esse sceleribus, sceleratis placatus, & odio habere peccata, non homines. Imò clementiæ species est sævire in malos; & beneficium præstatur impijs, quando pœna irrogatur. *Feliciores enim, teste Boëtio, sunt improbi supplicia luentes, quàm si eos nulla justitia pœna coërceat.* (e) Ferrum ergo, ubi opus est, Princeps stringat, non tam ut perimat homines, quàm ut scelera pereant. Quod ut eveniat feliciter, unum adhuc necesse est; nimirum, ut sua prius expugnet vitia, qui aliena vult oppugnare scelera. Alium vix talem facies, qualem esse vis, si tu ipse tatis non sis, qualis esse debes. Scelera in purpura rarò displicent; laudatores faciliè inveniunt & imitatores. Frustrà interdices cæteris, quæ ipse amplecteris. Incaßum argues supplicio, quæ tuo commendas exemplo. *Languere membra capite vitiato solent.* (f) Seu (ut clariùs Romanæ Princeps eloquentiæ) *vitiosi Principes non solum vitia concipiunt ipsi, sed ea infundunt in civitatem, plûsque exemplo, quàm peccato nocent.* (g) A te ergo bellum incipe, quicumque summâ cum potestate populos gubernas. Rege teipsum, ut possis regere subditos. Teipsum vince, ut de alijs victorias possis reportare. *Nulla est major victoria, inquit Seneca, quàm vitia domuisse. Innumerabiles sunt, qui urbes, qui populos habuêre in potestate; paucissimi, qui se.* (h) Cura, ut sis è numero peccatorum.

ALBER-

(b) *Cic. pro Mil.* (c) *Sen. de Tranq. c.7.* (d) *Sen. in Herc. Fur.* (e) *De sens. phil. prof. 4.* (f) *Sim. Ang. in Zen.* (g) *Cic. de leg.* (h) *Lib.3. nat. quæst.*



# ALBERTUS RUDOLPHI MAGNICÆSARIS FILIUS

**C**andidum quamvis nomen præferat ;  
Atram tamen effugere non potuit fortunam,  
Quæ tamen iterum frontem mutavit, (pillo.  
Illique album dedit calculum, qui nigro nunquam erat signandus la-  
Filium Austriaci titulo Archiducis ornatum,  
Romani quoque Cæsaris honore augeri voluit Genitor Augustus,  
Non tam, quia ejusdem sanguinis, quàm quia paris erat virtutis.  
Nec deerat plurium Electorum consensus,  
Qui quidem vivo Parenti recusârunt socium adjungere Imperij,  
Defuncto tamen succedere voluêre Filium,  
Ut translato in ALBERTUM diademate  
Merita RUDOLPHI MAGNI post mortem coronarent,  
Et superstes in Filio Parens post fata imperaret.  
Sed unus maximè obstitit Moguntinus Antistes,  
Qui cognati sanguinis, quàm alienæ virtutis amantior,  
Emendicavit Procerum suffragia pro Adolpho Nassovio,  
Quæ debebantur ALBERTO AUSTRIACO;  
Eumque evexit ad Imperium, qui mansisset melior, si non imperâisset.  
Honores enim Cæsarei mutârunt mores Adolphi,  
Ut jam eò minor esset virtute, quò major erat dignitate.  
Indignum propterea rati Principes  
Eum dominari populis, qui serviebat vitijs;  
Germanæ gentis esse Imperatorem, qui cupiditatum erat mancipium;  
Scelus dejecerunt è folio, ut exaltarent virtutem;  
Nassovium exuerunt purpurâ, ut induerent Austriacum.  
Sed vi extorquendum fuit ab Adolpho, quod sponte cedere debuisset.  
In patulo Spiram inter & Wormatiam campo  
Congressus cum corrivali ALBERTUS, hastâ per oculum adactâ  
Lucem simul & vitam illi ademit,  
Qui jam priùs splendorem Majestatis Cæsareæ tenebris involverat.  
Ita ruente Nassovio ad Imperium surrexit Austriacus,  
Et post ferream tempestatem aurea Germaniæ serenitas illuxit,  
Quæ tamen non diu tenuit,  
Cum, veluti solis calor terræ vapores,

Sic celsus honor trahat æmulum livores:

Parere noluerunt Proceres Cæsari,

Quo nemo melior tum poterat imperare;  
Membra suum in caput seditionem moverunt,

Quo tamen aptius vix erat aliud,  
Cum hoc fuerit Austriacum, id est, Imperijs natum & factum.  
At timete rebelles!

Fictam Gigantum Tragœdiam veram mutabitis in historiam.

Qui subijci non vultis Jovi pacificè regnanti,  
Subesse debebitis severè fulminanti.

Ita est. Jam fulgurat, atque tonat;  
Devincit fortitudine, quos erexit audacia,  
Non tantum Cæsar Austriacus, sed & Victor Germanicus.  
Cæteros, eosque majores ALBERTI triumphos

Quis tenui calamo perstringet?

Dixisse satis est: Idem illi erat vivere, quod vincere.  
Felicibus prælijs labores Herculis, & signa Zodiaci adæquavit,  
Dignissimus, cujus fama perennet in terris,  
Et gloria in cœlis resplendeat.

TRIUMPHATOR appellari meruit, (set.  
Non tantum, quod de hostibus, sed etiam, quod de seipso triumphâs.  
Adhibuit terrorem potentiæ, sed non amisit suavitatem clementiæ,  
Non minoris in parcendo facilitatis,  
Quàm in vincendo felicitatis.

Unde tantò plus sibi comparavit gloriæ.

Quantò difficilior est genus victoriæ

Post superatos hostes seipso fieri fortiorem,

Et domitâ gente rebelli iracundam mentem subjugare.

VICTORIOSO nempe PATRI TRIUMPHATOR FILIUS

Similis erat in omnibus,

Indole, fortitudine, clementiâ, dignitate, numero triumphorum;

Uno tantum dissimilis vitæ exitu,

Quia maturè obiit, & infeliciter,

Anno nimirum Imperij nono à fratris filio trucidatus.

Si tamen præmaturè mortuus dici potest,

Qui jam tum victoriarum cursum absolvit;

Aut infelix appellari,

Cujus Posteritati Divina Providentia nec metas rerum,  
Nec tempora ponit.



# ALBERTO PRIMO CÆSO HOSTE CORRIVALI, DEBI- TUM SIBI IMPERIUM OCCUPANTI,



*Et hoc decebat roboris tanti virum. Sen.*

Hercules devicto Dracone aurea carpens poma Hesperidum scenicè effingitur.

*Hercules solus cum Dracone pugnans.*

**A**Urata tandem carpere Hesperijs libet  
Poma in viretis. Talia Alciden decent  
Præmia. Triumphos inclytâ partos manu  
Aurum coronet. Lubricum sed quis gradum  
Movet, trifulcæ spiculo linguæ minax,  
Tumens veneno, stirpe Gorgoneâ satus  
Truculentus anguis? Ergo virtuti meæ  
Iterum palæstra instruitur? Herculeo novum



Rursus domandum robori monstrum datur :  
Armabo dextram ; victus addetur meis  
Draco triumphis. Hercules vinci haud potest ,  
Sed cuncta vincere Herculis virtus potest.  
Vix natus orbi , duplicem tenerâ manu  
Potui Chelydram frangere , & facere irritam  
Junonis iram. Capite septeno tumens  
Deinde serpens sensit inflictum meâ  
Ictum supremum dexterâ. Cecidit Fera,  
Quam nutrière Mænali cellis jugis  
Fauni bicornes. Quique Nemeæis fuit  
Lactatus antris , corpore immani leo,  
Apérque terror Arcadum , nostris jacent  
Armis subacti. Nec meam præsens Draco  
Effugiet iram. Gloriam Alcidae suâ  
Illustriorem faciet examinis nece.  
Quodcunque cupio vincere , hoc dextrâ statim  
Victrice sterno. Flammeis frustra minas  
Intentat oculis ; squameum frustra rotat  
Syrma , & reclusis faucibus vanos parat  
In me furores coluber insanus. Cadet  
Ferale monstrum. Victor Alcides erit.  
O clava ! felix clava ! monstrorum rubens  
Cruore fuso , robore egregio potens ,  
Ferax triumphi ! rursus Herculeâ manu  
Librata sævi ; belluam immanem feri,  
Opprime , trucida. Prosperè , ex animo datus  
Successit ictus. Hercules iterum suâ  
Clavâ triumphum meruit , & palmam tulit.  
Jam poma tutus carpo , & eximium mei  
Tandem laboris præmium victor fero.  
Jam vivo , jam triumpho , & optatos diu,  
Nil jam timente dextrâ , fructus lego.  
Sum dives auro , ditior propriâ tamen  
Virtute , tantas quæ mihi confert opes.

# ALBERTI PRIMI EFFATUM: QUOD OPTIMUM, IDEM JUCUN- DISSIMUM.

**I**Ta comparatum est genus humanum, ut tristitiam horreat, amet lætitiā; fugiat melancholiam, Eutrapeliam amplectatur. Jucundæ illi Poëtæ aliās Tragici admonitioni promptissimè obtemperant universi: *Vivite lati; properat cursu vita citato, volucrisque die rota precipitis vertitur anni.* (a) Quod quidem ego improbare non ausim, cū id ipsum Regum sapientissimus hortetur: *Tristitiam longè repelle à te; multos enim occidit tristitia, & non est utilitas in illa.* (b) Optimè ergo sibi consulit, quisquis gaudium quærit, si tamen quærat ibi, ubi inveniri potest. Multa sunt; quæ nomen quidem habent lætitiæ, rem tamen non habent; videntur jucunda, non sunt; foris gratiosum exhibent nitorem, intus acerbum tegunt dolorem. Quid agis? (si tuas tamen curas interpellare licet) avare Euclio, auri, argentique heluo, solícite Mammonæ minister? Gaudium, inquis, quæro. Ubi? In divitijs. Quod quæris, non invenies. Nam *divitiarum amor insatiabilis longè amplius desiderio torquet, quàm usu suo hominem refrigeret, utpote quarum acquisitio laboris, possessio timoris, amissio doloris plena invenitur.* (c) Divitiæ spinæ sunt; pungunt, non ungunt; animum sauciant, non sanant. Et tu gloriosa Thraſonum de stirpe oriunde, qui in magnis & mirabilibus supra te ambulas, quid moliris, quid cogitas? Gaudium quæro, ais. Sed ubi? In honore & gloriâ. Nec tu, quod quæris, invenies. Quia *Fortuna magna non caret formidine, nec splendor eminens valet periculo.* (d) Gloria est veluti aura; inflat, non explet. Affinia sunt honos & onus; quò ille altior, tantò gravior. Tu quoque Sybaritarum moribus, aut Epicuri legibus imbuta Troſſule, quid mente volvis? Gaudium quæro, respondes. Ubi? In voluptatibus. Minimè omnium, quod quæris, invenies. Quia *habet omnis hoc voluptas; stimulis agit fruenter, apiumque par volantium, ubi grata mella fudit, fugit, & nimis tenaci ferit iccta corda morsu.* (e) Fallax illa est; dum ludit amore, illudit dolore; plus aloës, quàm mellis habet. Si ergo nec splendet in auro,

D 3

nec

(a) *Sen. in Herc. Fur.* (b) *Eccli. 30* (c) *S. Bern.* (d) *Apollod.* (e) *Boët. l. 3. met. 7.*



nec fulget in honore, nec in amore blanditur vera jucunditas, ubi inveniatur, quæ tam sollicitè ab omnibus investigatur? Paucis dicam. Quære, quod est optimum, & invenies jucundissimum. Intra te habere potes, quod desideras. Non opus est, ut alienos emendices favores, ut aurum largiendo profundas, ut potentiorum implores subsidium. A tua, non aliena potestate vera pendet læticia. Gaudium tu ipse tibi dare potes, quod nemo potest eripere. Vis clariùs hoc intelligere? Audi Senecam? *Gaudium non nascitur, nisi ex virtutum conscientia. Non potest gaudere, nisi fortis, nisi justus, nisi temperans.* (f) Romano Philosopho Romanus consentit Orator: *Conscientia bene actæ vitæ, multorumque benefactorum recordatio jucundissima est.* (g) Si forma corporis vi suâ ita rapit oculos & animos, ut secundùm Aristotelem cæcorum sit percunctatio, cur fiat, ut libentiùs cum formosis, quàm deformibus conversemur; quid non poterit forma animi? Quod pulchrum, hoc charum. *Nihil autem virtute est præstantius, nihil pulchrius; & bonum est, & optabile, quidquid ex hujus geritur imperio.* (h) Corporis forma bonum fragile est, quantumque accedit ad annos, fit minor, & spatio carpitur ipsa suo. (i) Sed *Virtus repulsa nescia sordida intaminatis fulget honoribus.* (k) Huic igitur ante omnia amor & labor impendendus. Plus animi cultui, quàm formoso vultui tribuendum. Neque ulla fides habenda colori, nisi qui à virtute promanat. Sed nolim, ut tua tantùm te virtus oblectet; aliena etiam tibi placeat, velim. Si magni & sinceri es animi, in alijs æstimare aut amare nihil debes, nisi quod bonum est. Quodd si summâ etiam in alios potestate dominaris, cave, ne claros reddas, nisi quos virtus illustrat. Scelesti ministri etiam pium Principem de improbitate faciunt suspectum; & quidquid ferè à Palatinis geritur, id Principi vel jubenti, vel conniventi tribuitur. Unde rectè Isocrates monuit: *Principatum adeptus nullius improbi ministerio utitor; nam quidquid ille deliquerit, tibi velut auctori imputabitur.* Incommodam sibi, suisque fecit Rempublicam Commodus Imperator, qui omnes velut infidiatores à limine removebat, quos aut probitas, aut disciplina ulla etiam medioeris illustraret. (l) Meliùs Imperio consuluit Theodosius, qui aulam suam veluti scholam instituit, in qua se suosque ad pietatem exerceret. (m) Plures dent Superi nobis Theodosios, nullum Commodum.

JOSE-

(f) *Lib. 8. Epist. 3.* (g) *Cic. in Cat. Maj.* (h) *Sen.* (i) *Ovid.* (k) *Horat.* (l) *Herodian.* (m) *Theodoret.*



# JOSEPHUS

LEOPOLDI MAGNI CÆSARIS FILIUS.

**B**Revi lineâ longum complexi sumus elogium.  
Plus enim significamus, quàm dicimus.

Ex Leone nonnisi fortissimus,

A Primo nulli gloriâ & felicitate secundus;

A Magno nec indole, nec virtute minor,

Ex stirpe Austriaca nonnisi optimus nasci potuit & debuit.

Diu quidem distulit cœlum dare, qui diu desiderabatur;

Sed dare voluit donum perfectum.

Neque sola potuit natura sufficere;

In subsidium multis precibus advocanda erat gratia,

Ut **DIGNUS MAGNO CÆSARE FILIUS** procrearetur.

Decebat enim, ut miraculo propè par esset ejus nativitas,

Cujus vita non erat futura sine prodigijs.

Primum accidit in Hungaria,

(cessum.

Quando **JOSEPHO** I. datum est, quod nemini Antecessorum fuit con-

Anno ætatis nono, decumanam obtinuit prærogativam,

Regis non tantum Apostolici, sed etiam hæreditarij.

Bene egisti Hungaria!

Tuam in Austriaco Capite tandem firmâsti coronam,

Ne impostero funestis instabilis fortunæ casibus rotaretur.

Alterum in Germania contigit prodigium,

Quando **JOSEPHUS** re tenuit, quod alij vix spe conceperunt.

Non quòd virtus deesset, & merita;

Sed quòd tales essent afflictæ Germaniæ Ephemerides,

Quæ dies depositionis potius, quàm Festa Exaltationis signarent.

Augustæ Romanum evectus est ad solium,

Ut illud firmaret, quando labefactare tentavit invidia.

Tenerâ manu arripuit sceptrum Germaniæ,

Ut illud servaret, quando grandæva ambitio voluit extorquere.

Illustrior cum Patre in Imperio resplenduit Filius,

Quando sanguineam è vicinia nubem repentinus belli turbo induxit,

Et aurea luminaria ferreâ voluit tempestate extinguere.

Actum agitis, quicumque laceßitis Austriacos!

Privilegium habent virtutis, quæ premitur, nunquam opprimitur;

Exal-

Exaltatur, dum in ruinam impellitur.

Fortunâ altior est Austria; hinc non quovis casu rotatur.

Confirmatum est cor ejus in Domino;

Hinc non commovebitur, donec despiciat inimicos suos.

Sed jam tertium maximumque restat prodigium,

AUGUSTE REX!

Animus nempe tuus supra ætatem maturus;

Si vitia excipias, capax omnium;

Fortior, quàm ut ab hoste terreri,

Constantior, quàm ut à fortuna moveri possit;

Laboris magis appetens, quàm quietis;

Ad Martem pariter & artem factus;

Æquè plenus sapienti PATRIS CONSILIO, ac solerti INDUSTRIA;

Paternas inter victorias formatus ad triumphos;

Præter virtutem nihil amans, Præter DEUM nihil timens;

Magnâ denique LEOPOLDI mente nequaquam minor;

AMOREM in subditis, TIMOREM in hostibus;

In orbe toto admirationem excitat, & expectationem.

Quæcunque dispersa per Augustos Principes suspeximus,

Ea in animo Tuo collecta veneramur;

Crispi nempe integritatem, Arcadij & Honorij religionem,

Ludovici pietatem, Othonis magnanimitatem,

Inviictam Alberti Austriaci fortitudinem.

PLUS OMNIBUS UNIS.

Alia adhuc annis secuturis orbi dabis prodigia;

Inter quæ facilè hoc summum erit;

Quodd Augustissimum Parentem Tuum facies immortalem.

Quia de Te, quod Philippus de Alexandro, dicere potest:

Non moriar, quia, in quo vivam, in terra relinquo.

Interim à meritis encomijs ad pios affectus convertimur,

Et, quod laude cœpimus, faustâ precatione concludimus.

Vota pro Constantino Augusto Constantij Filio olim concepta,

Pro JOSEPHO AUGUSTO LEOPOLDI M. FILIO iteramus.

Quamobrem Te, summe rerum Sator! oramus & quæsumus,

Ut hunc in omnia sæcula Principem serves.

Fac, ut, quod optimum humano generi dedisti, permaneat æternum;

Omnèque in terris degat ætates JOSEPHUS cum LEOPOLDO.

JOSE-





JOSEPHO PRIMO  
 INTER GLORIOSOS AUGUSTISSIMI  
 GENITORIS TRIUMPHOS PARI VIRTUTE  
 ET FELICITATE CRESCENTI,



*Unus Pellao Juveni sufficit orbis. Juven.*

Alexander Magnus inter illustres Philippi Macedonis Parentis sui victorias educatus in theatrum adducitur.

*Alexander Solus.*

Quid me sereni Principis nomen juvat,  
 Titulusque Regis? quid nitens auro thronus,  
 Sceptrum pyropis fulgurans, rutilus micans  
 Diadema gemmis, & toga Oebalio rubens

E

Muri-



Murice? quid amplius Regiæ splendor domûs?  
 Quid fulcra Pario è marmore, è cedro trabes?  
 Quid ordo Procerum, & turba famulantûm juvant;  
 Si desit unum & maximum Regis decus,  
 Mens digna Rege? Non color vestis, nitor  
 Sceptri, coronæ splendor, augusti lares,  
 Frequens minister, nec favor sortis facit  
 Regem, sed animus Regias dotes habens.  
 Quid, me Philippi Regis egregiâ satum  
 De stirpe, prodest? Magna Genitoris mei  
 Facinora, multis inclytus lauris honor,  
 Nomen triumphis celebre quid laudis parit,  
 Si non resideat mente par virtus Patri?  
 Ut ergo dignus Regio videar throno,  
 Nullâque parte degener magni ferar  
 Soboles Philippi, bellicas laudes volo,  
 Et gloriosi facta Genitoris sequi.  
 Generosa virtus intimas complet fibras,  
 Et Martialis pectora incendit calor.  
 Victoriosos inter Heroës locum  
 Placet mereri, pèrque certantûm globos,  
 Per fulgurantes ensibus cuneos virûm,  
 Per tela & ignes hostium gradi pede  
 Non indecoro, & Patrias lauros novis  
 Cumulare lauris. Sic Alexandrum decet.  
 Virtute clarus Genitor ô quantum decus  
 Est filiorum! Filius fortis sui  
 Quanta est Parentis gloria! Hoc posthac agam,  
 Ut, nostra tantûm Gesta qui videt, sciat,  
 Quâ sim creatus stirpe, quo natus Patre.  
 Philippe Magne Genitor, Heroum jubar,  
 Lux alma Regum, Martis egregium genus,  
 Bellique fulmen! Nominis splendor tui,  
 Et rara virtus semper hærebunt meo  
 Inscripta cordi. Tendet huc omnis labor,  
 Tantum ut secundis exprimam Gestis Patrem,  
 Ne sim Philippo Magno Alexander minor.

# JOSEPHI I. SYMBOLUM:

## AMORE, TIMORE.

**N**on semper fulminare, nec semper condonare Jovem decet. Perpetua venia, Numinis contemptum, & peccandi licentiam; continua fulmina horrorem, & crudelitatis suspicionem inducent. *Medio tutissimus ibis.* (a) Nescit regnare, non tantum ille, qui nihil scit dissimulare, sed etiam, qui nil audet castigare. Nimius rigor subditorum animos exasperat, immoderatus favor enervat. Amor sine timore levis est, Timor sine amore gravis. Illius proprium est suavem efficere justiciam, istius fortem reddere clementiam. Ille debet rotare sceptrum, iste vibrare gladium; Ille pacis olivam prætere, iste belli fulmina cudere; Ille parcere subjectis, iste debellare superbos. Sine isto hebescit acies authoritatis, sine illo fervor justitiæ plus æquo inardescit. Unus sine altero Regiæ Majestatis interitus; conjunctus uterque Imperantium salus. Tarquinium Priscum regno exuerunt Romani, quod solo regeret timore. Nervæ verò imperante (procul dubio, quod solo uteretur amore) dicere solebant, pejus esse Principi subjici, qui omnia, quàm qui nihil permetteret. Non tantum crudelis est, qui parcat nemini, sed etiam, qui veniam dat omnibus. Ut Medicum & multa funera infamant, & nulla præscripta pharmaca; sic Principi labem aspergunt & nimia supplicia, & nulla scelerum vindicta. Urendum, secundum est, ubi mali pertinacia mitiora eludit remedia. Ferro & igne abstinendum, quando vis morbi vel syrupo cedit, vel malagmati. Verum est Poetæ effatum: *Non bene conveniunt, nec in una sede morantur Majestas & amor;* (b) Si de amore intelligas, qui timore destituitur. Neque falsa est sententia Oratoris: *Nulla vix Imperij tanta est, quæ premente metu potest esse diuturna;* (c) Si de timore accipias, qui caret amore. Eximiè totam gubernandi artem complexus est, major reliquis morum magister, quia sanctior, D. Gregorius, quando dixit: *Miscenda est lenitas cum severitate, faciendumque quoddam ex utraque temperamentum; ut neque multâ asperitate exulcerentur subditi, neque nimia benignitate solvantur. Sit itaque amor, sed non emolliens; sit rigor, sed non exasperans; sit zelus, sed non immoderatè sapiens; sit pietas, sed non plus, quàm*

expe-



*expediat, parcens.* (d) Si in homines barbaro aut ferino more viventes exerceretur potestas, solus fortassis timor sufficeret. Si in probos & sapientes (qui soli ut homines vivunt) imperium tantum gereretur, unico forsan opus esset amore. At, quia plerique feritatem exuunt humanitatem tamen non induunt, idcirco illi, qui ritè præesse vult omnibus, magnoperè curandum est, ut timeatur à subditis, & ametur. Non stat aliâ lege Politia, quàm natura. Hæc coalescit ex elementis inter se pugnantibus, quæ si certâ inter se temperie ordinentur, totum conservant universum. Illa amore nititur & timore, qui, licèt sibi invicem videantur contrarij, Reipublicæ tamen unitatem procurant, si caveatur in utroque: *Nequid nimis.* Amæna est harmonia, quæ et sono acuto & gravi, cantu duro & molli temperatur. Neque ingrata subditis est principis gubernatio, si rigori justitiæ immisceat se veritatem clementiæ, timorem amore moderetur. Bene meritis largiatur præmia, malos poenis coërceat; exaltet virtutem, deprima vitia; oppugnet hostes, cives defendat; fideles foveat, frangat rebelles; adulationes torvo repellat supercilio, sed bona consilia benigno auditu excipiat; pacem promoveat, ad bella paratus sit; facili cunctis exhibeat benevolentiam, supremam tamen non minuat auctoritatem; beneficia liberaliter eroget, jura majestatis nulli communiceat. Hæc si præstat, amari meretur Princeps, debet timeri. Quia tamen difficile, inter duo extrema semper medium invenire, quid expedit, excedere amore, an timore? Austriacum cape responsum ex ore duorum testium omni exceptione majorum. Rudolphi I. verba sunt: *Severum & immitem me fuisse aliquando penituit, lenem & placabilem nunquam.* Caroli V. effatum est: *Amorem ab amore provocari: nemini odiosum fore, qui benevolentiam singulos complecteretur.* Amor ergo timore est potior. Imò timor alius laude dignus non est, quàm qui nascitur ex amore. Hic enim solus *Regna custodit metus.* (e) Quem superbia, injustitia, vel crudelitas gignit, plus facit ad everisionem, quàm Reipublicæ conservationem. Hoc enim metu *hævisæ nunquam Imperia retinentur diu.* (f) Primus amori, proximus timori locus debetur. Hic sequatur, ille præcedat, necesse est. Plus illi, minus huic à provido Principe tribuatur. Breviter, sed bene Poëta Tragicus:

*Decet timeri Casarem; at plus diligi.* (g)

(d) *L. 2. in Job. c. 8.* (e) *Sen. in Oed.* (f) *Sen. in Theb.* (g) *Sen. in Octav.*

O. A. M. D. G.



SPECIAL 93-7  
8614

